



**Corporaziun d'aua  
Spina da vin  
Disentis/Mustér**

---

**statuts**  
2006

1. ediziun

# Cuntegn dils statuts dalla Corporaziun d'aua Spina da vin

## I. Determinaziuns generalas

Art. 1	Num e sedia	5
Art. 2	Intschess	5
Art. 3	Intent	5
Art. 4	Representaziun giuridica	5
Art. 5	Commembradi e dretg da retrer aua	5
Art. 6	Dretg da votar	6
Art. 7	Eligibladad e perioda d'uffeci	6
Art. 8	Exclusiun	6
Art. 9	Recusaziun	6
Art. 10	Mieds legals	6
Art. 11	Publicaziun	7
Art. 12	Protocol	7

## II. Organisaziun

Art. 13	Organs	7
Art. 14	Radunonza generala	7
Art. 15	Cumpetenzas	8
Art. 16	Modus da votar ed eleger	8
Art. 17	Suprastonza	8
Art. 18	Cumpetenzza generala	8
Art. 19	Cumpetenzas specialas	8
Art. 20	Convocaziun dalla suprastonza	9
Art. 21	Presidi	9
Art. 22	Suttascripziun	9
Art. 23	President	10
Art. 24	Vicepresident	10
Art. 25	Actuar	10
Art. 26	Cassier	10
Art. 27	Cau tecnic	10
Art. 28	Revisurs da quen	10
Art. 29	Ugau-fontauna	10

## III. Furniziun d'aua

Art. 30	Lubientscha da retrer aua	11
Art. 31	Incumbensa dalla corporaziun d'aua	11
Art. 32	Plazzament dils conducts	11

Art. 33	Colligiament al conduct	11
Art. 34	Furniziun d'aua	12
Art. 35	Hidrants	12
Art. 36	Controllas d'installaziuns privatas	13
Art. 37	Scartezia d'aua	13
Art. 38	Disturbis	13
Art. 39	Sclauder l'aua	13
Art. 40	Begls publics	13
Art. 41	Begls privats ed aua currenta	13

#### **IV. Disposiziuns tecnicas**

Art. 42	Execuziun e manteniment dallas installaziuns	14
Art. 43	Controla dalla colligiazion al conduct	14
Art. 44	Cuvretga	14
Art. 45	Dumbrader	14
Art. 46	Lingia-casa	15
Art. 47	Conduct electric colligiaus cun la lingia d'aua	15
Art. 48	Lingias publicas	15
Art. 49	Responsabilidad	15

#### **V. Uorden da taxas**

Art. 50	Finanziaziun	16
Art. 51	Taxa da colligiazion	16
Art. 52	Midadas e renovaziuns vid baghetgs existents	16
Art. 53	Taxa provisoria da colligiazion	16
Art. 54	Taxa da diever	16
Art. 55	Pagaments da taxas	17
Art. 56	Cass excepziunals	17
Art. 57	Dretg da pègn	17

#### **VI. Determinaziuns penalas e transitorias**

Art. 58	Prescripziuns penalas	17
Art. 59	Entrada en vigur	17

## I. Determinaziuns generalas

### Art. 1

<sup>1</sup> Sut il num Corporaziun d'aua Spina da vin exista ina corporaziun d'aua dil dretg public el senn dils art. 63 ss. dalla lescha da vischnauncas dil cantun Grischun.

*Num e sedia*

<sup>2</sup> La corporaziun d'aua posseda atgna personalitad giuridica ed ei da cuoz illimitau. La sedia dalla corporaziun d'aua ei a Disentis/Mustér.

### Art. 2

Igl intschesch dalla corporaziun d'aua ensiara il territori en zona da baghegiar naven da Mumpé Tujetsch entochen Disla da vart seniastra dil Rein anteriur, excepriu Clavianev e Caschuarz.

*Intschesch*

### Art. 3

<sup>1</sup> La corporaziun d'aua ademplescha ils pensums adossai ad ella dalla vischnaunca e da ses commembers.

*Intent*

<sup>2</sup> En special ein ils suandonts pensums adossai ad ella:

- a) furnir sufficientamein buna aua da beiber a casas privatas, baghetgs publics ed industrials, a menaschis purils, begls e plazzas publicas.
- b) procurar per in quantum sufficient aua en cass da fiug enteifer la zona da baghegiar digl intschesch dalla corporaziun d'aua Spina da vin.
- c) procurar per l'erecziun ed il manteniment dallas tschaffadas, reservuars e dalla reit publica digl aquaduct.
- d) procurar per il manteniment dallas atgnas ovras electricas.

### Art. 4

La corporaziun d'aua rempiazza el rom da ses pensums la vischnaunca da Disentis/Mustér e representa en quei sector conform agl art. 72 dalla constituziun communal e tenor la lescha communal davart il provediment d'aua ses dretgs e sias obligaziuns inclus il dretg d'imponer taxas e contribuziuns.

*Representaziun giuridica*

### Art. 5

<sup>1</sup> Commember dalla corporaziun d'aua ei scadin proprietari d'in object colligiaus al conduct d'aua.

*Commembradi e dretg da retrer aua*

<sup>2</sup> Il dretg da retrer aua dalla corporaziun d'aua han tuts proprietaris da casas privatas, habitaziuns da cumproprietad, hotels, casas d'albiert ed auters baghetgs industrials, economics ni auters edifecis digl intschesch dalla corporaziun.

### **Art. 6**

*Dretg da votar*

<sup>1</sup> Il dretg da votar en fatgs dalla corporaziun d'aua han commembers che retilan aua.

<sup>2</sup> Mintga casada, respectiv mintga proprietari da baghetgs ha mo ina vusch.

<sup>3</sup> Tier casas cun dretg da proprietad comunabla ni da cumproprietad tucca il dretg da votar als proprietaris comunabels, als cumproprietaris ni en cass da proprietad en condomini all'administraziun. Substituziun cun plenipotenza ei lubida.

### **Art. 7**

*Eligibladad e  
perioda d'uffeci*

Scadina persuna cul dretg da votar ei eligibla en organs dalla corporaziun d'aua, sch'ella ei buca privada da quei dretg entras sentenza penala. Tuts organs vegnan eligi mintgamai per ina perioda d'uffeci da treis onns.

### **Art. 8**

*Exclusiun*

Parents e quinais en lingia directa, consorts e fargliuns astgan buca appartener il medem temps agl organ d'execuziun e da controlla.

### **Art. 9**

*Recusaziun*

<sup>1</sup> In commember d'in organ dalla corporaziun d'aua sto prender stgisa tier tractaziuns che pertuccan ses interess ni ils interess da ses parents ni da sia quinzona. Il representant giuridic d'in fatg che vegn tractaus dalla autoritad sto medemamein prender stgisa.

<sup>2</sup> L'autoritad en damonda decida en absenza dils interessai, schebein raschuns da recusaziun existan.

### **Art. 10**

*Mieds legals*

<sup>1</sup> Encunter las taxaziuns relaschadas dalla corporaziun d'aua sa vegnir protestau a scret enteifer 20 dis tier la suprastonza dalla corporaziun d'aua.

<sup>2</sup> La suprastanza dalla corporaziun d'aua examinescha la protesta e relai ina decisiun cun indicar ils mieds legals (art. 38 dalla lescha communal da davart il provediment d'aua).

<sup>3</sup> Protestas encunter disposiziuns dalla suprastanza dalla corporaziun d'aua ein d'inoltrar enteifer 20 dis a partir dalla comunicaziun alla suprastanza communal da Disentis/Mustér.

### **Art. 11**

Las comunicaziuns dalla corporaziun d'aua ein da publicar egl organ da publicaziun official dalla vischnaunca da Disentis/Mustér.

*Publicaziun*

### **Art. 12**

Per las sedutas dils organs dalla corporaziun d'aua e radunonzas generalas eis ei mintgamai da menar in protocol. Quel sto cuntener silmeins las propostas, ils conclus ed ils resultats d'elecziuns. El ei da sutscriver dil president e digl actuar e da suttametter per aprobaziun alla proxima radunonza dall'autorità pertuccada.

*Protocol*

## **II. Organisaziun**

### **Art. 13**

Ils organs dalla corporaziun d'aua ein:

- a) la radunonza generala
- b) la suprastanza
- c) ils revisurs da quen

*Organs*

### **Art. 14**

<sup>1</sup> La radunonza generala ei igl organ suprem dalla corporaziun d'aua e decida cun la maiortad dallas vuschs dils votants presents. Quella vegn convocada dalla suprastanza silmeins inaga ad onn ei decuors dall'emprema mesadad digl onn.

*Radunonza  
general*

<sup>2</sup> Cura ch'ils basegns pretendan sa la suprastanza era convocar ina radunonza generala extraordinaria.

<sup>3</sup> Las tractandas ston vegnir publicadas silmeins 8 dis avon la radunonza egl organ official da publicaziun.

<sup>4</sup> Mintga radunonza convocada conform als statuts ei cumpetenta da decider.

<sup>5</sup> Ei astga vegnir votau sulettamein davart tractandas stadas publicadas e vegnidas predeliberadas dalla suprastonza.

### **Art. 15**

*Cumpetenzas*

En cumpetenzas dalla radunonza generala stattan specialmein:

- a) la relaschada e midada dils statuts e d'ordinaziuns e reglaments cun vigur generala.
- b) l'elecziun dalla suprastonza e dils revisurs da quen.
- c) l'approbaziun dil quen annual e dil preventiv.
- d) conclus davart novas expensas unicas che survargan frs. 50'000.–.
- e) fixar la salarisaziun dils organs.

### **Art. 16**

*Modus da  
votar ed eleger*

<sup>1</sup> Las votaziuns ed elecziuns vegnan fatgas per regla cun maun pli. Sin proposta d'ina quarta dils presents eis ei da scrutinar.

<sup>2</sup> Tier votaziuns cun maun pli ni per scrutini decida igl absolut pli dallas vuschs.

<sup>3</sup> Eligius ei tgi che ha contonschiu cun maun pli ni per scrutini igl absolut pli dallas vuschs valeivlas. Tier ina secunda votaziun vala il relativ pli. Tier tuttina bia vuschs decida la sort.

<sup>4</sup> La surdada d'uffeci succeda cun igl emprem da fenadur.

<sup>5</sup> Survarga il diember da candidats buca il diember da posts sa l'elecziun succeder en globo.

### **Art. 17**

*Suprastonza*

<sup>1</sup> La suprastonza ei igl organ executiv dalla corporaziun d'aua e secumpona dil president e da quater commembers.

<sup>2</sup> La suprastonza vegn eligida per ina perioda da treis onns e seconstituescha sesezza cun excepziun dil president.

### **Art. 18**

*Cumpetenzas  
generalas*

La suprastonza empeila l'administraziun dalla corporaziun d'aua. Ella procura plinavon che las prescripziuns dils statuts vegnien ademplidas e ch'ils conclus dalla radunonza generala vegnien exequi.

### **Art. 19**

*Cumpetenzas  
specialas*

La suprastonza ei cumpetenta en tuttas damondas che cumpetan



buca expressivamein ad in auter organ. Ella ha plinavon las suandontas cumpetenzas specialas:

- a) representar la corporaziun d'aua anoviars.
- b) relaschar reglaments administrativs e directivs da survetsch.
- c) fixar las classas d'objects conform agl art. 26 dalla lescha davart il provediment d'aua dalla vischnaunca.
- d) concluder davart novas expensas unicas egl importo netto da tochen frs. 50'000.–. Per reparaturas e sanaziuns urgentas ei igl importo buca limitaus.
- e) surdar las lavurs el rom dils conclus dalla radunonza generala.
- f) conceder lubientschas per novas colligiaziuns agl aquaduct.
- g) deliberar tuttas fatschentas ch'ei da suttametter alla radunonza generala.
- h) fixar la salarisaziun dils funcziunaris.
- i) decider davart menar process e recuors.
- j) conceder plenipotenzas per la representaziun dalla corporaziun en caussas da dretg.
- k) procurar che las prescripziuns federalas e cantunalas vegnien ademplidas.
- l) eleger igl ugau-fontauna.

## **Art. 20**

La seduta da suprastonza vegn convocada dil president dalla corporaziun d'aua ni sin giavisch da dus commembers da suprastonza aschi savens sco las fatschentas pretendan.

*Convocaziun dalla  
suprastonza*

## **Art. 21**

Las sedutas dalla suprastonza dalla corporaziun d'aua vegnan tgamunadas dil president dalla corporaziun d'aua, en cass d'impediment dil vicepresident.

*Presidi*

## **Art. 22**

La suttascripziun legalmein valeivla per la corporaziun d'aua cumpeta al president ensemen cun in ulteriur commember da suprastonza, en cass d'impediment al vicepresident ensemen cun in ulteriur commember da suprastonza.

*Suttascripziun*

<i>President</i>	<b>Art. 23</b> <sup>1</sup> Il president dalla corporaziun d'aua representa la corporaziun. El survegilescha il decuors dallas fatschentas dalla suprastonza ed il menaschi dalla corporaziun d'aua en general. <sup>2</sup> Ensemen cun in ulteriur commember da suprastonza sa el decider davart lubientschas regularas.
<i>Vicepresident</i>	<b>Art. 24</b> Il vicepresident assista e substituetscha il president.
<i>Actuar</i>	<b>Art. 25</b> Igl actuar redegia tut ils protocols dallas radunonzas.
<i>Cassier</i>	<b>Art. 26</b> <sup>1</sup> Il cassier meina il quen, fa annualmein tuts incassos e pagaments. <sup>2</sup> El siara quen mintgamai cun la fin da december.
<i>Cau tecnic</i>	<b>Art. 27</b> Il cau tecnic survegilescha las installaziuns e las ovras electricas dalla corporaziun d'aua.
<i>Revisurs da quen</i>	<b>Art. 28</b> Ils dus revisurs da quen examineschan mintg'onn igl entir menaschi finanziel dalla corporaziun d'aua, rapportan e fan propostas alla radunonza dils commembers. Els vegnan eligi per ina perioda da treis onns.
<i>Ugau-fontauna</i>	<b>Art. 29</b> Il pensum digl ugau-fontauna sedrezza tenor il contract da lavur e siu carnet da duers ni per incumbensa dalla suprastonza resp. dil president dalla corporaziun d'aua.

### III. Furniziun d'aua

#### Art. 30

<sup>1</sup> La lubientscha da retrer aua dat il president ensemen cun in consuprastont. En cass specials decida la suprastontza.

*Lubientscha  
da retrer aua*

<sup>2</sup> Il termin per la lubientscha da colligiaziun sedrezza tenor ils termins dalla lubientscha da baghegiar dalla vischnaunca da Disentis/Mustér.

#### Art. 31

<sup>1</sup> La corporaziun d'aua construescha e meina in agen provediment d'aua ed in'atgna reit da hidrants. Ella pren tuttas mesiras per schurmegiar e garantir l'aua da beiber.

*Incumbensa dalla  
corporaziun*

<sup>2</sup> L'extensiuin dils stabiliments pil provediment d'aua e la reit da hidrants sedrezza tenor il plan general d'avertura.

#### Art. 32

<sup>1</sup> Ils conducts publics d'aua duein per regla vegnir tschentai sin terren communal. Nua che la necessitad per il stabiliment ei dada, san conducts d'aua era vegnir tschentai sin terren privat. Ei en tals cass ina cunvegnientscha cul proprietari buca pusseivla, vegn il dretg cantunal d'expropriaziun applicaus. En quei cass vegn la servitud impurtada el cudisch funsil.

*Plazzament  
dils conducts*

<sup>2</sup> Sto il conduct d'aua ch'appartegn alla corporaziun vegnir spustaus, per exempel a caschun d'ina surbaghegiada, succeda quei sin donn e cuost dalla corporaziun d'aua aschilunsch ch'il dretg ei buc acquistaus.

<sup>3</sup> Vegn igl aquaduct d'aua erigius e cumpletaus tenor il plan da quartier e vegn quei plan midaus aschia che la reit d'aua sto vegnir dislocada ni adattada, ston ils proprietaris pertuccai surprender ils cuosts che seresultan.

#### Art. 33

<sup>1</sup> Las colligiaziuns privatas alla reit principala digl aquaduct van a cuost dils privats (inclusiv T e siara).

*Colligiamet  
al conduct*

<sup>2</sup> Per regla succeda il colligiamet al conduct principal dalla corporaziun d'aua. Possessurs da lingias privatas san denton, cun il consentiment dalla corporaziun d'aua, era schar colligiar sin atgna resca il conduct da vischins cunfinonts a lur conduct privat, quei aschinavon che la lingia ei dimensiunada sufficientamein.

<sup>3</sup> L'installaziun sto vegnir fatga tenor las directivas per installaziuns tecnicas aschuntadas alla lubientscha da colligiaziun.

### **Art. 34**

*Furniziun  
d'aua*

<sup>1</sup> La corporaziun d'aua furnescha aua per diever normal per schischom egl areal da baghegiar sin intschess dalla corporaziun.

<sup>2</sup> Colligiaziuns ordeifer la zona da baghegiar san vegnir lubidas sin damonda speciala.

<sup>3</sup> La furniziun d'aua sedrezza tenor la capacitat digl aquaduct. Ina pressiuin constanta sa buca vegnir garantida. En cass da scartezia d'aua, da disturbis, d'incendis ni d'auters motivs sufficients ein restricziuns dalla furniziun d'aua d'acceptar senza dretg d'indemisaziun.

<sup>4</sup> Ei la pressiuin ella lingia privata colligiada cun la reit publica buca sufficienta, san las mesiras necessarias per augmentar la pressiuin vegnir pridas cun consentiment dalla corporaziun d'aua. Tuts cuosts che sedattan ordlunder van sin donn e cuost dallas persunas privatas.

<sup>5</sup> Ei la pressiuin ella reit publica memia gronda ein ventils per reducir la pressiuin d'installar all'entrada dalla lingia egl edifices. Tuts cuosts en quei connex, sco era donn che seresultan muort buca risguardar quellas prescripziuns, van sin donn e cuost dallas persunas privatas.

<sup>6</sup> Sperditas d'aua ein d'annunziar immediat alla corporaziun d'aua.

### **Art. 35**

*Hidrants*

<sup>1</sup> Ils hidrants surveschan sco indrez per stizzar fiug ed astgan buca vegnir duvrai per auters intents. Sin damonda sa la corporaziun d'aua far excepziuns.

<sup>2</sup> Prelevaziuns d'aua dalla reserva per stizzar fiug per exerchezis da pumpiers han da s'adattar alla reserva d'aua actuala.

<sup>3</sup> L'aua dils hidrants, begls ed auters reservuars privats che vegn duvrada en seracass ni per exerchezis da pumpiers ei da furnir gratuitamein.

<sup>4</sup> Tgi che fa diever dils hidrants stat persunalmein buns per scadin donn caschunaus cun utilizar els falliu. La responsabladad persunter spira dil mument ch'in organ dalla corporaziun ha puspei surpriu igl implont.

**Art. 36**

La suprastanza sa ordinar controllas d'installaziuns d'aua. Igl abonment ei obligaus da dar libra entrada al persunal dalla corporaziun d'aua da tut temps e da schar inspectar l'installaziun privata. Las controllas ein d'annunziar al pertuccau.

*Controllas  
d'installaziuns  
privatas*

**Art. 37**

<sup>1</sup> La corporaziun d'aua ei buca obligada da furnir aua nuninterruttamein als consuments. Ella ei era buca responsabla persunter, sche la furniziun vegn interrutta da temps en temps ni sch'il quantum d'aua ei sminuius.

*Scartezia d'aua*

<sup>2</sup> En cass da scartezia d'aua sa la corporaziun d'aua reducir la furniziun d'aua als consuments entras mesiras adequatas.

<sup>3</sup> Schar flessegjar aua duront igl unviern per impedir il schelar ei strentgamein scumandau.

**Art. 38**

Per eventuals disturbis vid indrezs privats en consequenza da reparaturas ni defects sa la corporaziun d'aua buca vegnir fatga responsabla.

*Disturbis*

**Art. 39**

La corporaziun d'aua sa sclauder l'aua tier ina retratga illegala.

*Sclauder l'aua*

**Art. 40**

<sup>1</sup> La corporaziun d'aua mantegn begls publics enteifer siu intschess. Ils begls surveschan per aua da beiber e per embellir il maletg dils vitgs.

*Begls publics*

<sup>2</sup> L'aua dils begls astga buca vegnir duvrada per diever privat.

**Art. 41**

<sup>1</sup> Mintga begl privat drova ina lubientscha per retrer aua. Ils begls ston vegnir manteni dil possessur, il qual paga ina taxa annuala da diever.

*Begls privats ed aua  
currenta*

<sup>2</sup> En cass urgents sa la suprastanza reducir il quantum d'aua. Vegn il begl buca duvraus ni mantenienus, sto l'aua vegnir serrada giu.

<sup>3</sup> Il diever privat per aua currenta per biotops, tratgas da pèschs, aquariums etc. sa vegnir lubius entras ina lubientscha speciala. La taxa da diever d'aua currenta sedrezza tenor il dumbrader.

## IV. Disposiziuns tecnicas

*Execuziun e  
manteniment dallas  
installaziuns*

### Art. 42

<sup>1</sup> Colligiaziuns privatas san vegnir fatgas mo tenor las prescripziuns dalla corporaziun d'aua. Il president ensemen cun igl ugau-fontauna fixeschan il punct da colligiaziun, la dimensiun dalla lingia sco era la posiziun dil dumbrader. La colligiaziun per lingias privatas astga vegnir endrizzada mo d'interpresas ni persunas licenciadas. Per cundrezs d'installaziun d'aua da beiber valan las directivas dalla Societad svizra per l'industria da gas ed aua da beiber, plinavon las disposiziuns da natira higienica davart l'instituziun per l'aua da beiber concernent la survigilonza digl aquaduct. Novs materials, fuormas e cundrezs ein lubi mo sch'els ein vegni examinai ed approbai dalla SVWG (Schweizer Verein von Gas- und Wasserfachmännern).

<sup>2</sup> Il proprietari ei obligaus da mantener ses implonts privats. Cass cuntrari sa la corporaziun d'aua schar exequir quellas lavurs sin cuost dil proprietari.

<sup>3</sup> Ulteriuras disposiziuns ein regladas ellas directivas per installaziuns tecnicas aschuntadas alla lubientscha da colligiaziun.

*Controla dalla  
colligiaziun al  
conduct*

### Art. 43

Conducts montai astgan buca vegnir cuvretgs avon la collaudaziun e la mesiraziun entras la corporaziun d'aua. Ils possessurs u ils installaturs ein obligai d'annunziar ad uras il termin da colligiaziun. La controla cumpeggia era l'emprova da pressiuin entochen 15 bars.

*Cuvretga*

### Art. 44

Tuts conducts d'aua vegnan tschentai en ina profunditad da silmeins 120 – 140 cm ed introduci el baghetg da maniera segira encunter scheltira. El foss vegn il conduct circumdaus cun ina cozza da material tgirau ni da sablun da silmeins 20 cm altezia. Vegn il conduct el medem foss cun la canalisaziun, sto el vegnir tschentaus pli ault e sper la canalisaziun, denton minimum 120 cm sut tiara.

*Dumbrader*

### Art. 45

<sup>1</sup> Da principi vegn tut diever d'aua furnius sur in dumbrader ch'ei en possess dalla corporaziun d'aua. El sto vegnir endrizzaus en in liug bein contonschibels e segirs encunter scheltira. La

corporaziun d'aua quenta ina taxa annuala per il dumbrader. Quella vegn fixada el regulativ da taxas da diever d'aua.

<sup>2</sup> Deliberaziuns d'installar in dumbrader san vegnir decididas dalla suprastanza dalla corporaziun d'aua, aschinavon che l'installaziun d'in dumbrader stess buca en relaziun ni culs cuosts d'installaziun ni cul diever d'aua.

<sup>3</sup> Donn vid ils dumbraders d'aua che vegnan caschunai tras negligentscha da personas privatas vegnan reparai sin donn e cuost da quellas. Sche la mesiraziun dil consum d'aua vegn messa en dubi entras il consument, duei il dumbrader vegnir controllaus officialmein. Seresulta dalla controlla in sbagli da pli che 10% van ils cuosts dalla controlla sin donn e cuost dalla corporaziun d'aua, els auters cass sin donn e cuost dallas personas privatas.

<sup>4</sup> Avon il dumbrader d'aua astga buca vegnir retratg aua per diever privat.

## Art. 46

<sup>1</sup> La lingia-casa per in baghetg sedrezza tenor las prescripziuns dalla SVGW. Ella sto ver in diameter da minimum 40 mm.

*Lingia-casa*

<sup>2</sup> Il T, la siara, la lingia-casa e la tabla d'indicaziun s'audan agl abonment ed ein era da mantener da quel. La siara sto esser veseivla e marcada cun ina tabla d'indicaziun.

## Art. 47

L'installaziun dil fil-nulla ed il fil-tiara dil conduct electric sedrezza a norma dallas prescripziuns tecnicas dil sindicat svizzer per installaziuns electricas (SEV).

*Conduct electric colligiaus cun la lingia d'aua*

## Art. 48

Mintga siara principala digl aquaduct vegn marcada cun ina tabla d'indicaziun entras la corporaziun d'aua. La corporaziun d'aua ha il dretg da plazzar tablas per indicaziuns da siaras vid baghetgs privats, quei senza indemnizaziuns al possessur, denton cun consultar quel.

*Lingias publicas*

## Art. 49

La responsablada correspunda agl art. 21 dalla lescha davart il provediment d'aua dalla vischnaunca da Disentis/Mustér.

*Responsablada*

## V. Uorden da taxas

### Art. 50

*Finanziaziun*

La corporaziun d'aua incassescha contribuziuns e taxas che cuvieran ils cuosts e ch'ei conformas al caschunader per construir, menar, mantener sco era per renovar (sanar, remplazzar) implonts pil provediment d'aua.

### Art. 51

*Taxa da colligiaziun*

<sup>1</sup> La taxa da colligiaziun agl aquaduct public sedrezza tenor ils artechels 24 tochen 28 dalla lescha davart il provediment d'aua dalla vischnaunca da Disentis/Mustér.

<sup>2</sup> Sco basa da schazetg valan las indicaziuns per la valeta nova dalla cumissiun cantunala da schazetg da baghetgs.

### Art. 52

*Midadas e renovaziuns vid baghetgs existents*

<sup>1</sup> Per mintga midada ni renovaziun da baghetgs existents eis ei da pagar ina taxa da colligiaziun supplementara, aschinavon che la valeta nova dil baghetg s'augmenta. Quellas reglas valan era lu, sch'ins augmenta la valeta dil baghetg en pliras etappas enteifer plirs onns.

<sup>2</sup> Sco basa da schazetg valan las indicaziuns per la valeta nova dalla cumissiun cantunala da schazetg da baghetgs.

<sup>3</sup> La taxa d'augment vegn fixada el regulativ da taxas da diever.

### Art. 53

*Taxa provisoria da colligiaziun*

<sup>1</sup> La suprastonza fa ina calculaziun provisoria en rama da 80% dalla calculaziun da cuosts tenor las indicaziuns ella damonda da baghegiar.

<sup>2</sup> La calculaziun definitiva vegn fatga aschispert che la valeta nova dil baghetg, eruida entras la cumissiun cantunala da schazetg da baghetgs ei enconuschenta.

### Art. 54

*Taxa da diever*

<sup>1</sup> La taxa da diever sedrezza tenor la lescha davart il provediment d'aua dalla vischnaunca da Disentis/Mustér, artechels 29 tochen 33 e vegn fixada en in regulativ da taxas da diever approbaus entras la radunonza generala.

<sup>2</sup> Objects colligiai senza consum d'aua han medemamein da pagar la taxa fundamentala da provediment.



**Art. 55**

Ils quens da taxas ein conform agl artechel 35 dalla lescha davart il provediment d'aua dalla vischnaunca da Disentis/Mustér da pagar sco suonda: taxas provisorias e taxas da colligiazion enteifer 60 dis, taxas da diever enteifer 30 dis.

*Pagaments da taxas*

En cass d'in pagament retardau vegn quintau in tscheins da retard che corrispunda allas tarifas cantunalas.

**Art. 56**

Cass excepziunals sedrezzan tenor artechel 36 dalla lescha davart il provediment d'aua dalla vischnaunca da Disentis/Mustér.

*Cass excepziunals***Art. 57**

Per las taxas da colligiazion exista in dretg da pègn che ha la preferenza viers tuts ulteriurs dretgs da pègn tenor art. 131 dalla lescha introductiva tiel cudisch civil svizzer.

*Dretg da pègn***VI. Determinaziuns penalas e transitorias****Art. 58**

Tgi che cunterfa sapientivamein ni ord negligentscha a quests statuts u prescripziuns e determinaziuns che sebasan sin quels, vegn castigiaus dalla corporaziun d'aua cun fallonza da tochen frs. 20'000.–. Daventa quei cun intent da gudogn ei la corporaziun d'aua buca ligiada vid igl import maximal.

*Prescripziuns penalas***Art. 59**

Ils presents statuts ein vegni approvai dalla radunonza generala dalla Corporaziun d'aua Spina da vin ils 22 da mars 2006 e passan immediat en vigur. Quests statuts remplazzan tuttas determinaziuns e decisiuns precedentas.

*Entrada en vigur*

Edwin Deflorin  
president

Bruno Tschuor  
actuar

Approbau dalla suprastonza communal da Disentis/Mustér tenor decisiun dils 5 d'avrel 2006.

Aldo Tuor  
president communal

Andri Hendry  
canzlist communal





